

Pravilnik o vrsti, cijeni i načinu plaćanja usluga

Na osnovu člana 17. stav 2. tačka 3. Zakona o unutrašnjim poslovima Kantona Sarajevo ("Službene novine Kantona Sarajevo", br. 22/00-Prečišćeni tekst, 15/02, 18/02 i 28/02) i člana 30. stav 3. Zakona o javnom okupljanju („Službene novine Kantona Sarajevo“, broj 32/09), na prijedlog policijskog komesara, ministar unutrašnjih poslova Kantona Sarajevo d o n o s i

P R A V I L N I K

o vrsti, cijeni i načinu plaćanja usluga dodatnog angažovanja policijskih službenika i drugih usluga koje Uprava policije Ministarstva unutrašnjih poslova Kantona Sarajevo pruža u svrhu osiguranja javnih skupova izvan svoje redovne djelatnosti

DIO PRVI - OPĆE ODREDBE

Član 1. (Predmet)

Ovim Pravilnikom propisuju se vrste, cijene i način plaćanja usluga dodatnog angažovanja policijskih službenika i drugih usluga koje Uprava policije Ministarstva unutrašnjih poslova Kantona Sarajevo (u daljnjem tekstu: Uprava policije) pruža u svrhu osiguranja javnog reda i mira izvan svoje redovne djelatnosti, a povodom održavanja javnih priredbi sportske, kulturne i zabavne prirode, sastavni dijelovi i obrazac ugovora o pružanju usluga, kao i druga pitanja od značaja za navedenu oblast.

Član 2. (Ravnopravnost spolova)

Gramatička terminologija u ovom Pravilniku podrazumijeva uključivanje oba roda.

Član 3. (Značenje izraza)

Izrazi upotrijebljeni u ovom Pravilniku imaju slijedeće značenje:

Policijski službenik je osoba zaposlena u Upravi policije čiju je definiciju propisao član 2. stav 2. Zakona o policijskim službenicima Kantona Sarajevo („Službene novine Kantona Sarajevo“, br. 25/06 i 4/08),

Javna priredba je okupljanje organizovano radi ostvarivanja prihoda u okviru registrovane djelatnosti koja, s obzirom na očekivani broj učesnika i prirodu priredbe zahtjeva preduzimanje posebnih mjera sigurnosti.

Osiguranje javnih skupova izvan svoje redovne djelatnosti je postupak pružanja usluga izvan redovne djelatnosti koje, u skladu sa odredbama Zakona o javnom okupljanju (u daljnjem tekstu: Zakon) i sigurnosnom procjenom Uprave policije, preduzima Uprava policije i koje prevazilaze obim poslova redovnog održavanja javnog reda i mira na prostoru koji se neposredno nalazi uz mjesto održavanja javne priredbe, kao i na mjestu održavanja javne priredbe po zahtjevu organizatora.

Dodatno angažovanje policijskih službenika je dodatni angažman policijskih službenika na osiguranju javnih priredbi izvan redovne djelatnosti Uprave policije u smislu člana 3. tačke c) ovog Pravilnika.

Nadležni policijski organ je Uprava policije ili organizaciona jedinica Uprave policije nadležna za preduzimanje poslova i zadataka propisanih Zakonom.

DIO DRUGI – VRSTE I CIJENE USLUGA

Član 4. (Cijena sata dodatnog angažovanja policijskih službenika)

Cijene sata dodatnog angažovanja policijskih službenika su:

policijski službenik uniformisane i kriminalističke policije	14,00 KM/h,
policijski službenik Jedinice za podršku i Jedinice za specijalističku podršku	16,00 KM/h,
policijski službenik Jedinice za specijalističku podršku – vodič službenog psa	30,00 KM/h,
policijski službenik za KDZ pregled - bez rada sa ekspl. sredstvima	38,00 KM/h,
policijski službenik za KDZ pregled – rad sa ekspl. sredstvima	55,00 KM/h.

Član 5. (Vrste i cijene ostalih usluga)

Vrste ostalih usluga su:

korištenje službenih vozila,

iznajmljivanje metalne zaštitne ograde,

korištenje specijalističke opreme za izvršenje preventivnog KDZ pregleda (stadiona, objekata, vanjskih površina i prostora, aviona, vozila, osoba i sl.) i druge specijalističke opreme.

Cijene korištenja službenih vozila iznose:

putničko vozilo	26,00 KM/h,
autobus	36,00 KM/h,
teretno vozilo 2,5 t i kombibus	33,00 KM/h,
teretno vozilo 5,0 t i interventno vozilo	34,00 KM/h,

motocikl	25,00 KM/h,
specijalno vozilo (vodetni top i dr.)	64,00 KM/h.

Cijena korištenja metalne zaštitne ograde je 5,00 KM po jednom metru.

Cijene korištenja specijalističke opreme za izvršenje KDZ pregleda iznose:

paket osnovne opreme (teleskopsko ogledalo, baterijska lampa, pipalica)	20,00 KM/h,
prenosni i stacionarni RTG uređaj, metal detektorska vrata i metal detektori	30,00 KM
za svako uključivanje uređaja, a za daljnji rad istog –	20 KM/h.

Član 6. (Formiranje ukupne cijene)

Ukupna cijena usluga dodatnog angažovanja policijskih službenika i drugih usluga koje Uprava policije pruža u svrhu osiguranja javnih priredbi izvan svoje redovne djelatnosti formira se sabiranjem cijena usluga iz čl. 4. i 5. ovog Pravilnika.

DIO TREĆI – UGOVOR O PRUŽANJU USLUGA

Član 7. (Ugovor o pružanju usluga)

Kada Nadležni policijski organ, u svrhu osiguranja javnog reda i mira izvan svoje redovne djelatnosti, preuzima mjere dodatnog osiguranja, najkasnije 48 sati prije početka javne priredbe, između organizatora i ovlaštenog lica Ministarstva unutrašnjih poslova Kantona Sarajevo (u daljnjem tekstu: Ministarstvo) sklapa se ugovor o pružanju usluga.

Ugovor o pružanju usluga iz stava 1. ovog člana sadrži:

označenje ugovornih strana,

naziv: UGOVOR O PRUŽANJU USLUGA,

predmet,

vrste i cijene usluga,

način i rok plaćanja,

porez na promet,
međusobne obaveze,
forma ugovora,
vrijeme sklapanja ugovora,
izmjene
sporovi,
završne odredbe.

Ugovorne strane, pored sadržine ugovora o pružanju usluga iz stava 2. ovog člana, mogu ugovoriti dodatne elemente ugovora tako da ne narušavaju njegovu suštinu.

(1) Ugovor o pružanju usluga nalazi se na Obrascu broj 1. koji je sastavni dio ovog Pravilnika.

DIO ČETVRTI – PLANIRANJE PRUŽANJA USLUGA I KORIŠTENJE NAPLAĆENIH PRIHODA

Član 8. (Budžet)

Prihod od usluga iz čl. 4. i 5. ovog Pravilnika planira se u budžetu Ministarstva.

Novčana sredstva naplaćena za pružene usluge iz čl. 4. i 5. ovog Pravilnika su vlastiti prihod Ministarstva.

Član 9. (Prekovremeni rad policijskog službenika)

Obaveze Ministarstva iz ugovora o pružanju usluga, u dijelu dodatnog angažovanja policijskih službenika, izvršavaju se planiranjem, realizacijom i isplatom prekovremenog rada, a sve u skladu sa važećim zakonskim i podzakonskim propisima.

DIO PETI – PRELAZNE I ZAVRŠNE ODREDBE

Član 10. (Praćenje kretanja cijena usluga)

Nadležne organizacione jedinice Uprave policije i Uprave administracije i podrške dužne su pratiti kretanje cijena usluga iz čl. 4. i 5. ovog Pravilnika.

Organizacione jedinice iz stava 1. ovog člana dužne su o promjena iznosa troškova obavljanja usluga iz čl. 4. i 5. ovog Pravilnika obavijestiti ministra i policijskog komesara i predložiti odgovarajuću izmjenu ovog Pravilnika.

Član 11.
(Prestanak važenja)

Stupanjem na snagu ovog Pravilnika prestaju da važe drugi propisi i instruktivni akti koji se odnose na predmet ovog Pravilnika.

Član 12.
(Stupanje na snagu)

Ovaj Pravilnik stupa na snagu osmog dana od dana objavljivanja u „Službenim novinama Kantona Sarajevo“.

Broj: _____

Dana:

MINISTAR

Željko Mijatović